



TAPAK 10

Sports Minister-i SAI  
Headquarters semdang



TAPAK 3

Arunachal DGP-i tetuyubatem  
sülen anidaktsü mepishir

VOL. XVII NO. 166 (ADOK 166) DIMAPUR

SANGTENNÜ (TUESDAY) RONGCHII (APRIL) 14, 2020

5.00

## State sorkari temulung agüja inyaktsüla: DALT

**Dimapur, April 13 (TYO):** Nagaland nung Covid-19 mezüng putetba osang angashiba sülen Dimapur Ao Lanur Telongiem (DALT)-i state sorkar dang iba ama tensa ka nung tashishitsü melii inyaksangshitsü atema metetdaksüogo.

"Senotsü mesüra health dak sendakba onüktem süang sorkari ochishia osangtem sangdongtsüla. Talisa, linük ajunga shibangba sülen tangalen nungi Nagaland-i arurtem quarantine shitak masüba osang tejangja metetdaksütsü tim" ta DALT-i tanü sangdong ka nung ashi.

"Sorkari quarantine centre tem lapoka lir süra, kechiba tangalen nungi arurtem idakji mayu. Asü, sorkaria mapa inyakdar ta public dang sayutsü atema dang quarantine centre temji lapok?" ta parnokisa sorkar dang asüngdangogo.

Nagaland nung mapa shitak meinyakba ajanga Covid-19 aketer ka putetogo. Testing facility aser pre-screening kit maliba ajanga iba nisung dak anaben tashi 'negative' putet saka tangalenbo 'positive' putet, ta DALT-isa ashi.

Nagaland sorkari yokba sample ajak negative ta dang puteta lir aser iba ajanga temulung malemstsüsa akümer. Anungji, tangalen nungi arurtem ajak quarantine centre nung ayutsüla, ta DALT-isa takhanga agütsü.

"Dimapur nung ano shishilembar ka April 2, 2020 nü Dimapur-i aru aser shitakba agibo pa anogo 14 tashi quarantine asütsüba sernung April 11, 2020 nü pai charity sentong ka nung adenba osang angashia kanga aoksar. Iba sentong nung pai lennirtem aser yimsüsür aika den külemi noksa agiba print media aser social media balala nung prokshio. Iba ya ajanga state sorkari COVID-19 anema mapa shitak meinyakba sayur" ta DALT-isa metetdaksü.

Parnokisa state sorkar dang Dimapur-i aruba entry points ajak shibangtsü aser jungjunga mita anüktsü atema ayongzükogo.

Sorkar rejutem aser tanga local teloktem/NGO temi sorkar atema hand sanitizer aser face mask yangluba osang angazüker, anungji itemji nübortem nem angati lema agütsütsü imlar, ta DALT-isa ashi.

## Zion Hospital And Research Centre-i jangjatsür

**Dimapur, April 13 (TYO):** Nagaland nung COVID-19 aketer ka putetba atema Zion Hospital And Research Centre (ZHRC)-i sangdong ka ajanga osang jangjashitsüogo.

ZHRC ketdangsertemi ashiba agi, iba nisung ya tanga nursing home kati anemia agi kangshir ta ser ZHRC-i yok.

Idangji pa dang ainlen senzüba osang metetnüa asüngdang saka pai kecha mashi. Tasingji (April 11) iba nisung ya tanaben shiranga anir aru aser idangji pa ainleni aoba aiben asüngdangba sülen ang tebuti pa March 24 nü Kolkata nungi aruba nangzük, ta ZHRC-isa metetdaksü.

Doctor temi pa temang jungjunga reprangdang

coronavirus agi shirangba yimya ama ajitet aser iba jagi COVID-19 Hospital (Dimapur District Hospital) nung ketdangsertem den osang tongtep aser pa COVID-19 Hospital-i anir aotsü atema ashi. Zion hospital nung pa anepaludang staff mesüra tanga shirangertem dak memenatsüsa mapa inyakogo, ta ZHRC ketdangserisa ashi.

Assam Health Minister-i iba nisung ya Zion Hospital and Research Centre, Dimapur nungi GMC Hospital, Guwahati-i yok ta ashibaji tiyazü lir, kechiyong onoki pa COVID-19 Hospital (Dimapur District Hospital)-i dang yok aser pa komaser GMC Hospital, Guwahati atong'ar memetet, ta ZHRC-isa osang jangjashitsüogo.

## Eden Medical Centre indang taila osang prokshir

**Dimapur, April 13 (TYO):** Nagaland nungi COVID-19 putetsangi Eden Medical Centre semdang ta mejangjatetba nisung kari social media nung taila osang prokshir, ta EMC ketdangsertemi tanü sangdong ka nung metetdaksü.

Iba nisung yagi kodanga EMC nung medical teyari atema maru, ta parnokisa ashi.

Iba taila osang prokshiba atema temulung raksar aser ozüngi melaba ama iba osang prokshir indang maitsü jangjatsü atema ken o benoktsü

## Dimapur nung alir ka dak COVID-19 putet

**Dimapur, April 13 (TYO):** Nagaland nungi nisung ka dak Covid 19 keta lir ama temulung melemi Guwahati Medical College and Hospital (GMCH) nung anepalutsü atema anir oa tendangdang pa dak Covid 19 aliba putetogo.

"Dimapur nung nija hospital ka nungi shiranger ka GMCH-i yokba dak COVID 19 putetogo" ta Deobar aonung tesü Assam Health Minister, Himanta Biswa Sarma-i iba osang metetdakja liasü.

Himanta Sarma-i iba osang sangdongba sülen tanep 12:30 ako meta Chief Medical Officer's Office, Dimapur nung senden ka amen.

Iba senden nung Nagaland Health & Family Welfare Minister aser Special Committee member for Covid-19 S. Pangnyu Phom, Deputy Commissioner, Commissioner of Police, CMO Dimapur Y. Kikheto Sema aser Medical ketdangsertem aden.

Tanep 2:43 ako nung Nagaland health minister Pangnyu-i Twitter nung "Kanga dang tesasatüka Dimapur nungi nisung ka dak COVID-19 putetogo aser pa Guwahati kübok GMCH nung anepaludar" ta osang metetdaksü.

"Iba nisung den külemi kazür ajak quarantine asütsü aser nisungtem kümzüka ayutsü atema tesem kar shibangtsü" ta paisa ashi.

Hombarnü Pangnyu-isa Nagaland chief minister Neiphiu Rio dang "yashi Nagaland nungi COVID-19 aketer mezüngbuba putetba ajanga state ajunga shibangtsü nung ajungtsü ta shidanger. Coronavirus (COVID-19) prokshia moudaktsütsü atema talisa Dimapur district ajunga shibang nung ajungtsü" ta shidi ka zülü.

Paisa Chief Minister dang iba onük jungjunga shisadangtsü aser public kümzüka ayutsü atema state ajunga shibangtsü atema tetuyuba agütsütsü atema mepishia shidi nung zülü.

Dimapur nungi COVID-19 agi

shirangsang ya March 20 nü Air India tayimtsü ajanga Kolkata nungi Dimapur-i aru.

Pa anogo 14 atema home quarantine asütsü aser temang nung timtem kar adokra District Surveillance Unit nem osang sangoktsütsü atema ashi.

March 30, nü District surveillance team-i iba nisung den pa temang koma lir ta osang metetpela liasü. Idangji pai pa temang junga dang lir ta langzü aser idangjia District surveillance team-i pa dang quarantine mapang temang nung timtem kar danga adokra Chief Medical Officer indang Office nung control room den osang tongteptsü nenshia ashi.

April 12 nü shiranger tebuti ashiba agi, par jabasoji April 6 nungi azü adoka saksüa kangshi aser iba sülen April 8 nü Zion Hospital nung anioka anepalur April 10 nü mozü ki nungi anizük.

April 11 nü pa tanaben Zion Hospital nung anepalutsü atema anik aser iba aonung 6:30 ako meta Zion Hospital-i District Surveillance Team dang pa kanga mejungi shirangba osang metetdaksü.

Idangji District Surveillance Officer, Integrated Disease Surveillance Programme (IDSP)-i Zion ketdangsertem dang shirangerji COVID-19 Hospital, Dimapur-i yoktsü atema ashi.

April 11 aonung 9:43 ako meta shirangsangji Zion Hospital nungi discharge slip ka bener COVID-19 Hospital, Dimapur-i anir aru. Pa temang junga tendangtsü

atema Guwahati-i aotsü mepishiba ama COVID-19 Hospital, Dimapur ketdangsertemi pa yok.

Iba nisung dak coronavirus putetba sülen ketdangsertemi Marwari Patti aser Ghorapatty tesem ajunga shibangogo.

Tanga tetuyuba ka magütsü tashi GS Road nung aliba wholesale market aser Marwaripatti o Ghorapatty ajunga shibangtsü, ta ketdangsertemi ashi.

COVID-19 putetba nisung tsüraburtem dak Guwahati nung sample tendanger aser parnok government quarantine centre kati anir ogo.

Maneni, Zion Hospital nung iba nisung anasa aoba doctor, nurse aser staff ajak quarantine süogo.

Ketdangsertemisa iba nisung den külemi tayimtsü nung mener arurtem bushitepdar. Shitakba agibo parnok anogo 14 quarantine asüba mapangji April 6 nü tembangogo saka iba tensa ajuruba ajanga passenger tem dang pei pei District Surveillance Unit/CMO Office nem osang agütsütsü atema tetuyuba agütsüogo.

Nagaland sorkari nübortem dang iba osang angashir petsaprong masütsü atema mepishia metetdaksüogo.

Iba khuret koktettsü atema mapa ajak inyakdar aser nübortemi ketdangsertem den yariteptsü mepishir, ta sorkari ashi.

## COVID-19 putetba dak sendakba nung sample 36 bendenogo

**Dimapur, April 23 (TYO):** Hombarnü aonung Principal Secretary, Home, Abhijit Sinha IAS-ia sangdong ka nung ashiba agi, "COVID-19 putetba nisungji Marwari Patti nung alir anungji District Administration aser Police-i iba tesem den külemi Murgi Patti aser GS Road shibangogo."

Iba nisung Guwahati-i anir maodang anepaludak Zion

Hospital, Dimapur shibangogo aser idakji inyakba doctor, nurse aser staff den parnok kinungertem quarantine süogo, ta Abhijit Sinha-isa metetdaksü.

Dimapur nung alir dak COVID-19 putetba dak sendakba nung sample maneni bendendar aser tanü nikonktsütsü 5:00 ako tashi nung Kohima nungi sample 22 aser Dimapur nungi sample 14 bendenogo, ta paisa ashi.

## Department aser Directorate office kar lapoktsü

**Dimapur, April 13 (TYO):** April 13, 2020 nü Secretariat Conference Hall nung AHoD aser HOD tem den office tem lapoktsü indang onük atema senden ka menogo.

Senden nung tsünglanglen agüja aliba department aser Directorate office tem lapoktsü lemtet aser ketdangsertemi mapai aotsüba staff tem shimtsü asoshi mapa nungloktsü.

Home/ Medical/Finance/ Planning/ Power/ IT&C/ Agriculture & Allied Department/

Veterinary & AH/ PHED/ Social Welfare/ Fire & Emergency Services/ Home Guards & Civil Defence/ NIC/DIPR/ Food & Civil Supplies.

Temalen agüja aliba Department temi Home Department nem ketdangser aser staff tenüngtem den sorkar gari number tem agütsütsü atema metetdaksüogo. Iba ya DC/SP Kohima ket nungi pass meshitsü atema lir.

O s a n g j i seoc.nsdma@gmail.com mesüra

Whatsapp ajanga 7005-40-3886 dangi yoktsü akok.

Temalen shia maliba department aser directorate temi nodal officer ka den staff ana shimer agütsütsü atema sorkarisa metetdaksüogo.

Bangdak AHoD/HoD-i sorkar meyong gari indang number tem dang agütsütsüla aser pei department/directorate indang gari nung dang ketdangser/staff tem senzüsenbongtsüla, ta sorkarisa ashi.

**CORONAVIRUS WARA ASENOK LONGJEMER AKOKTSÜ ASOSHI -**

**Kechalenia Moi Kidang Mongang; Tangar Anasai Tou;**  
**Teni Tebang Sü agi Nembangang; Temang Tashi Itita Yuang;**  
**Kidang Asentzü Sendoka Exercise Agiang aser Sarasademang.**



### Legislator temi K. Badze, Kohima nung quarantine centre semdang



April 13, 2020 : Housing & Mechanical, Minister , Tongpang Ozukum aser Urban Development & Municipal Affairs, Advisor, Dr. Neikiesalie Nicky Kire nati anir K. Badze, Kohima nung yanglutsü aliba quarantine facility centre semdangba yangi noksa nung angur.

**Dimapur, Rongchii/April 13 (TYO):** Kohima nung COVID-19 tensa achayangtsü asoshi shimtetba Legislator in-charge, Minister Housing & Mechanical, Tongpang Ozukum aser Advisor Urban Development & Municipal Affairs, Dr. Neikiesalie Nicky Kire na den Deputy Commissioner Kohima, Gregory Thejawelie NCS aser Sr. S.P, K. Sophie nungeri aniba Kohima DTF ajanga

April 13, 2020 nü K. Badze, Kohima nung yanglutsü aliba quarantine facility centre semdanga liasü. Parnoki shimteta aliba tesem semdanga yangji quarantine facility center atema mapa inyakba semdang, kong ki ter nung takdang 304 keta yanglur. S.E PWD (Housing), K. Nakhro-i ashiba agi, yangji ki 26 lir aser tang atema control room densema ki 11 amshi

tenzüksü. Line department den yangji alirtem teyari agia taoba hopta nungi ki-o-jen müreka yanglushi tenzük aser hopta ka tsüngda amshitetsüsa akümtsü imlar, ta pai ashi. Kohima DTF on COVID-19 team den sorkar ketdangsertemi tang teinyakdak mapatem semdang aser legislator temi mapa meranga aser kera inyakba ngua ketdangser nem tenüngsang agütsü.

### Health & Family Welfare dept-i tetuyuba agütsür

**Dimapur, Rongchii/April 13 (TYO):** GOI tetuyuba nung lokti adenshiba tesem aser office tem disinfection asüba inyakyim den bendenloksema Health & Family Welfare-i mapa inyakba tesem nung tekümzükbä kübok inyaksangshitsü asoshi tetuyuba kar agütsüogo.

1. Hospital nung amendaker inyakertem shinga office telungi maitsü. Parnok tsüngdong arutsü melena webinar densema electronic means ajanga tongteprateptsü ajungshir.
2. Mapa inyakdak aser teka agi mapang shi kongshiba work stations tem 1% sodium hypochloride solutions agi anaben asemben kabo sanitize asütsüla aser nüngdakba mapang ajak nung merektetsüla.

3. Teka amteba mesalemtsüla
4. Tenük, teni aser tebang nung tekongshi
5. Mapang shia soap agi teka metsükang aser teka metsüktsü makokba tesemtem nung hand sanitizers amshia teka merekang
6. Akhetba aser hajiba mapang handkerchief amshia respiratory hygiene tajung benshiang aser tesem mashi mashi nung metzü temetsü
7. Nisung ajak mask asemtsü nüngdaker asü? (a) nü dak tashidak aketba temaitsü (akhetba, temang metaba mesera tangosang mesademba) lir mask semang, (b) COVID-19 agi shiranger anepalur süra mask semang, (c) health centre tem nung na health-

worker ka süra mask semang, (d) nisung aika adenshia aliba tesem kati aotsüsa kümra mask semang.

8. Nüngdak makaba nung senzusenpongba, telok tulu adenshia aliba tesem aser lokti senden balalai maotsü merangang.
9. Mask aser tissue papers tamshitu amala ajak kanga kümdanga indoktsüla.
10. Libaliro tajung benshiang: chiyongtsü shidak chiang, mapang peria mejangang, exercise agiang aser tsüngtong oa ajuruteptsü melena electronic means balala ajanga kinunger aser tembartem den tongtepratepang. Maneni moko achiba nungi pilaa liang aser yi o tanga temesepba mozü nungi pilaa liang.



(Abelen) Tuensang district kübok Block 9 nungi BDO temi sen 45,000 tenla agütsü. (Achichi) Village Council & VDB Tuensang district ajanga April 13, 2020 nü Tuensang Deputy Commissioner indang office chamber nung Tuensang DTF for COVID-19 atema sen 101,000 tenla agütsüba noksa nung angur.

### NDPP-i asükhu lemsatep

**Dimapur, Rongchii/April 13 (TYO):** April 13 nü NDPP Longleng Region Advisor B. Longphe Phom asüba osang angazüka NDPP aoksaba tir Chingwang Kongyak-i sangdong ka ajanga metetdaksüogo. Pa mapang tatsüka shirangba sülen District Hospital Longleng nung asü. Pa NDPP party nung mapang tatsüka dang tenzükaka pai Phom People's Council nung Vice President, Longleng Town Council nung Vice Chairman aser NPP Longleng tir menden abenba aser tanga lokti tentet

balala nung tenzükba ajanga pa sempet aser tatishitsü aketba lenir ka ama nüburtem bendanga agüja tenzükba sayur. Pa asüba ya NDPP party aser Naga nunger aser talisa Longleng nung alirtem atema takoksa tulu lir. NDPP nung tulu tila ajaki Mrs. Nokshen, chirnur aser kinungertem den asükhu lemsateper aser tulusang Tsüngremi iba amala mangyim jashi mapang parnok nem tashi aser anisüngzük agüjang ta onoki sarasademtsür, ta tir-isa ashi.

### Bhandari nung nüburtem ajak mask asemtsü tuyu

**Dimapur, Rongchii/April 13 (TYO):** Additional Deputy Commissioner Bhandari, Tiameren Chang, NCS-i April 13 nü Bhandari sub division nung alirtem ajak mask asemtsü tetuyuba agütsüogo. Bhandari sub division den arrtsü nung aliba kidanger Assam Golaghat district nung coronavirus agi shirangertem putetba osang angazükba sülen

Corona Virus (COVID-19) tashidak prokshia meyoktsü asoshi iba tetuyuba ya osang agütsüba mapang nungi benoka i n y a k s a n g s h i t s ü metetdaksüogo. Paise, kibong ka asoshi anogoshia tenüngdakba osettsüt lichaliyongtsü atema tetuyuba agütsür aliba sülen nüburtem ajaki metsüngareta anidaksü asoshi maneni nenshia metetdaksüogo.

### Longleng district ketdangsertemi yimtsüngtem semdang



Dimapur, Rongchii/April 13, 2020: Assam aser Nagaland arrtsülen Shutap check gate nung nurse kati nisung ka screening asüba yangi angur.

**Dimapur, Rongchii/April 13 (TYO):** ADC Tamlu, Y. Chingak Konyak aser Addl. Superintendent of Police, Atopu Sumi nati anir district administration, police, medical aser Rural Development department nungi ketdangsertemi state arrtsü nung aliba Bura Namsang, Yonglok, Setap (Shutap) aser Namhaching yimtsüngtem April 11, 2020 nü semdanga Assam den arrtsüa aliba tensa asadanga liasü.

alema mesenzütsü ajungshi. Parnokisa yimdaklirtem nem mask, hand sanitizer, sapon aser glove amala osettem lema agütsü. Kasa mapang State Bank of India, Longleng branch ajanga District Hospital, Longleng nem inverter ka den battery ka tenla agüja liasü. GHSS, Longleng nung khen asoshi mozüki yangluba nung yipten aser khu belenokba nung yaritsü atema DEF Longleng ajanga gari, nübu aser security agüja liasü.

Parnoki putu menden, arrtsülen check gate nung aliba sepaitem aser state nung COVID-19 tashidak prokshiba nungi azüoktsü mechi state shibanga aliba mapa küma inyaksü aser Assam-Nagaland arrtsü shibanga aliba IR patrolling tem den sensaksema liasü aser medical department ajanga Setap check gate nung thermal screening agia liasü.

District Hospital Longleng ya district COVID-19 hospital asütsü mükazüka yua lir. Khen asoshi yanglua aliba mozüki nung nüngdakba osettsüsettem anepalua lir, koba April 14, 2020 nü semzüka amshi tenzüktsü.

Item ketdangsertem rongnung EAC Tamlu, EAC Sakshi aser BDO Tamlu nungertema dena liasü. Parnoki yimdaklirtem dang tesem ajunga shibanga aliba mapang yimya shidak amshitsü aser arrtsü

COVID-19 tashidak wara nungi kümzüka alitsü asoshi district administration, police, civil society, SBI Longleng, DTF on COVID-19 aser sorkar agency balala aser kija-kibong shirmokisa lenmang balala nung yaritepa arur, nenok ajak dang kanga pelar, ta District Hospital, Longleng nung Medical Superintendent ajanga sangdong ka nung lemsatep.





Agartala nung aliba Rosedale apartment nung alirtemi Kidang dang mongang ta tezüluba amer agiba noksa ka angur. (Agartala, April 13)

## Assam nung COVID-19 aliba puteter 30 jungogo

**Guwahati, April 13 (Agencies):** Assam nung ano nisung ka dak coronavirus aliba putetogo aser pa züingsema shiranger ajak agi nisung 30 jungogo.

Hombarnü iba osang ya Assam Health Minister, Himanta Biswa Sarma-i Twitter nung metetdaksü.

Dhubri nung alir ka taoba ita Delhi nung Nizamuddin Markaz sentong nung aden ase rpa dak COVID-19 aliba putetogo, ta Sarma-i ashi.

Parnok teimbaka temang

tajungba kümдар Bodbar nungi mozü kitem nungi anizüktsü, ta Sarma-isa metetdaksü.

"nCoV ajanga shiranger teimba ka temang tajungba kümogo. Parnok dak timtem balaka madokra April 15 nung mozü kitem nungi yoktsü" ta pai ashi.

Assam nung swab samples 3,209 tashi bendenogo aser iba nung 3,070 tashi 'negative' putet, ta paisa shisem.

"Tablighi Jamaat nung adener nisung 1,421 nungi parnok 29 dak positive aser

1,358 dak negative putetogo. Sample 34 indang osang ano mangu lir" ta Sarma-isa metetdaksü.

Assam nungi arishi küm 35 tain ka aser Nagaland nungi arishi küm 33 tain ka dak coronavirus aliba putet.

Dhubri nungi Tablighi Jamaat nung adener ka dak coronavirus aliba putet aser Dimapur nungi aruba nisung ka dak-a coronavirus puteter GMCH nung anepaludar, ta Health Minister-i Twitter nung metetdaksü.

## Manipur nung 'Cheiraoba' benjungpei kidang dang amungtsü ayongzük

**Guwahati, April 13 (Agencies):** Coronavirus azüoktsü asoshi, Hombarnü, Manipur Chief Minister N Biren Singh-i nüburtem dang küm tasen benjungmung - Cheiraoba ya pei pei kidang amungtsü asoshi mepishia metetdaksüogo.

"Cheiraoba benjungmung tenüing nung Manipur nung er ajak dang tepela salem abener. Küm tasenba nung ayaoka aiba den külemi, state nunga terenlok bener arutsü atema asenok tesendaktep tasen küma yanglushidi aser kin balala tsüingda tali telongjem nung liyonga aotsü asoshi

merangdi," ta Biren-i Twitter nung ashi.

Manipur indang sobaliba benjungmung (lunar new year festival - Cheiraoba), koba dang 'Sajibu Nongma Panba' ta-a ajar, iba benjung ya Manipur nungertemi kanga meraketa ayongzük amunger.

Iba anogomung tenzüka, anepdang nüburtemi 'Lainingthou Sanamahi' tsüingrem külema aser sobaliba chiyungtsütem renemer tenla agütsür. Iba sülen chiyungba benjung tulu ayongzüktsü asoshi nüburtemi sobaliba yimya amshia chiyungtsü balala anepalua renemer.

Item chiyungtsü renemba sülen, kibong shia-i pei pei süngküm tejaklen aser tesülen chiyungtsü ya tenla agütsür aser iba sülen nübur tsüingda tesendaktepa akangshiteptsü asoshi pei pei renemba chiyungtsütem ya kinungertem aser medemertem den melenteper.

Iba mapang chiyungtsütem ya kinunger aser adianutem den külemi lemsatepa achir aser chiyungzükür sülen loktii achaayanga aser alakteta mekazüka ayuba tenem tila kati parnok ajak tur iba tenem tsüingrem nem tenüingsang aser akhüm agütsür.



Assam sorkari Hombar nungi Guwahati nung anepdang 10:00 ako nungi nikongtsütsü 5:00 ako tashi yi dokantem lapoktsü temelaba agütsüba sülen nisungtem yi alitsü atema dokan kima noktaktepa aliba noksa nung angur.

## Mizoram nung PPEs peria dang lir: Dr Pachuau

**Aizawl, April 13 (Agencies):** Mizoram nung health mapa inyakertem asoshi personal protective equipment (PPE) peria dang lir ta Health department ketdangser kati ashi

"Tang atema Mizoram nung PPEs peria dang lir" ta Integrated Disease Surveillance Programme (IDSP) indang State nodal officer aser epidemiologist Dr Pachuau Lalmalsawma-i ashi.

Ano, Centre dang nungi talila meshiogo aser kobi melii itemji atongtsü, ta paisa shisem.

Mizoram nung Zoram Medical College (ZMC), district mozükitem aser nika mozüki ajak nem PPEs lema agütsüogo, ta pai ashi.

Mizoram nung local manufacturers-ia PEEs arür, ta Pachuau-i metetdaksü.

Adianu aseme tenzüka fashion industry Vakira,

Women Polytechnic, Aizawl nung azüingertem aser tanga teloktemi parnok sasa health mapa inyakertem atema PPEs artsür, ta paisa ashi.

PPEs ji medical experts ajanga shisatsü agüja aser quality standard nung ajemdaker arür, ta paisa shisem. March 27, 2020 nü Mizoram-i Centre nungi PPEs 11,300, N-95 mask 10,000 aser tanga osettem angu.

Tata company-ia State sorkar nem PPEs 10,000 tashi agütsütsü atema sentong lir, ta osang ajanga ashi.

Tang tashi nung Mizoram nung coronavirus agi shiranger nisung ka dang lir aser paji ZMC nung anepaludar.

Iba nisungji intensive care unit (ICU) nung anepaludar aser ventilator agütsür saka Hokolbar nungi pa temang tajungba kümogo, ta Pachuau-i metetdaksü.

## Arunachal Pradesh nung shishilembar 3 apu

**Itanagar, April 13 (Agencies):** Arunachal Pradesh nung jenjang tur ayokba atema district administration den Legal Metrology & Consumer Affairs (LMCA) department ketdangsertemi shishilembar asem puogo.

Shishilembar jagi water bottles, cold drinks amala jenjang tur ayok aser ibaji Legal Metrology Act, 2009 aser Legal Metrology (Packaged Commodities) Rules, 2011 alema lir, ta osang ajanga ashi.

Shishilembar ana jenjang tali tur ayokba aser ka taila weights & measures amshiba atema tai tonglokja apu.

Capital Complex DC Komkar Dulom-i tetuyuba agütsüba nung ajemdaker

Doimukh SDO Sabaddam Tayang, LMCA Assistant Controller Taba Tabin, LMCA Inspector tem- Debia Tana aser Taw Tassar nungertemi G Extension, Polo Colony, D Sector aser Barapani tesemtem nung shishilembar 19 tashi mita ao.

Linük ajunga shibangba mapang shishilemartem aser public dang jenjang tur shishilembar masütsü atema tetuyuba agüja lir.

Itanagar capital region nung dokan aika nung jenjang tur ayokba osang aika onok dang shiogo, ta ketdangser kati ashi.

## Arunachal DGP-i tetuyubatem sülen anidaktsü mepishir

**Guwahati, April 13, 2020 (Agencies):** Arunachal Pradesh Director General of Police (DGP) RP Upadhyaya-i, nübur dang linük shibangba tetuyubatem sülen anidaktsü asoshi mepishia metetdaksüogo.

Nüboritemi yamaji inyak nung dang police-i tetsükdaksü kecha melii mapatem inyakteter, ta pai ashi.

"Linük ajunga shibangba takok ngua acha-ayangtetsüsa state nung police-i meranga inyakdar. Nüburtemi dang tashi anga anidakra, onok mapa ayong ayonga inyaktetsü," ta DGP-isa ashi.

Upadhaya-isa Itanagar nung tesem balala semdang aser iba mapang pai police tem den sensaksema liasü.

Duty inyakba mapang iba wara nungi pei sasa kümzüka ayutsü asoshi police-i tekümdangtsü meratem agidar,

ta DGP-isa metetdaksü.

Linük ajunga shibangba takok angutsü atema police-i mapa balala inyakdar, ta Upadhaya-isa shisem.

Nisung kar dak alaka, Arunachal Pradesh nung nisung aikati tetuyuba sülen tashi anga anidaker aser kasa mapang nüburtemi police den amalitepa yariteper, ta paisa ashi.

Iba ama tensa ka nung yimtsüing nung alirtemi kanga jeretpera mapa balala inyaker aser parnok sasa quarantine yimyatem anepalua achaayanga inyaker, ta Upadhaya-isa metetdaksü.

"Linük ajunga shibangba sülen manidakertem den onoki jembiogo aser sayubentsü agütsüogo. Parnok dang linük ajunga shibangba indang tongtibang temetetsütem angatdakja liasü," ta DGP-i shisem.





## TIR YIMYIM YIMOBILEM (EDITORIAL)

DIMAPUR SANGTENNÜ, RONGCHII (APRIL) 14, 2020

### Asenoka mejenbur

**Y** akanü nikongdang Nagaland government osang ajanga, tang tashi nungbo Nagaland nung alirtem dakbo Covid19 tashidak ka dak danga tonga mali ta metetdaksüli, Assam Medical minister-bai Nagaland nungi shiranga yokba nisung ka Guwahati Medical College Hospital nung Covid19 tashidak agi shirangba puteta anepaludagi ta alima dang sangdongba osangji Nagaland nung alir ajak asoshi taoksatsü osang tamajung ka liasü. Iba jagi Nagaland government nung Covid19 tashidak anema raraba tongpang nung wajak nung taküm ajak bendanga agüja nokdakertemang taoksaba aoksar südi. Atangji, shirangsangji Nagaland nung Covid19 Hospital Dimapur nungi yokba liasü ta angazüker, anungji Assam medical minister-bai alima dang mesangdongyongi asenoki tama metettsüla aser sangdongtsüla. Iba yabo meinyaknüba agi, mounüba agi mesüra makokba agi miimshia ayutsüba tashidak masü, kechiyong mekümdangra kenü nung yimkong remoka asütsüba tashidak lir. Tang tashi nung kanga shisabolua bilembaji nübortemibo kanga süoki ia agir saka mitsa nung nokdakertemi kanga zübaa agir ama putetter. Asenoki inyaktsüba ajak Tsüngrem nem dang shiloka toktsür asenokbo Tsüngrem meyong dena chitsüa amongertem kümogo. Asenoki metettsüba kaji, tia ajung ta südi, iba tashidak ya asen lima nung poktetter masü saka tangalen nungi arurtemi menar arua menaloktsüba tashidak ka lir. Aji oda, tang tashibo shisabolua tuluka malibaji, iba tashidak ya tzü nunga mesüra mopong nunga memenar. Anungji, government-i teyuba ama, iba tashidak agi asen lima atongba sülen bendanglen nungi arurtem ajak anogo 14 bosa tangar den külemi meyoktepa melii la mesüra pa kija tesem balaka nung amongtsüla. Ibayongji, government-i tesem balala nung quarantine center, tetezü tangalen nungi arurtem pei kidangi moudaktsüi khen tesem ka nung sota ayuba tesem, shimteta yua lir. Ajisüaka, Dimapur nungbo tangalen nungi arurtemji quarantine center nung ayutsü melen lokti nung sademsadema senzüdaktsüba osang angashir. Ibaji ajak atema lendong lir. Kodang nisung ka dak Covid 19 tashidak ya menadir, ibaji bomb tesashi amai akümer, anungji kodang iba nisungji mekümdangi senzüdir pa mesüra laji, pei mang agi bomb kümer tangar lokti alidak oa pokloktsür, suicide bomber, ka ama kümadoker. Iba jagi, iba tashidak yagi alima aika nung kenüyongi nisung noklang junga aremstsüsa ataloker. Tanü mesüra asung asen lima nung iba tashidak agi nisung ishika dak atong nungbo tanga Guwahati-isa yoktsü asü mesüra asenoki anepalutettsü. Ashiko, asenoki yokyonga Assam nungji yipten maliba agi magizükettsüa akok. Iba ama tia ka nung asenok meyong mozükitem renema aliba jenjang reprangdangra, tang ya Kohima nung shiranger yaritsü asoshi Naga Hospital nung ventilator dena yipten 7 lir, Dimapur District mozü kidangbo ventilator dena yipten 3 dang lir, ano Mokochung IMDH nung ventilator dena aliba yiptenbo ana dang lir. Tetezü tang dangbo Kohima nung Covid19 agi shiranger nisung 7, Dimapur nung 3 aser Mokochung 2, khen nung shiranger ajak agi 12 dang yaritettsü. Ibaji shisabolutsüka lir. Ano, Covid19 agi shiranger yaritsübaji ventilator-ji dang masü saka doctor aser nurse-tem shirangertem dak nungi tashidak memenatsüsa süoshi balaka asemstsü kanga nungdaker, Item süoshijibo peria akatsü imlar. Tanü ama tashidak tamajung anema tongpang nokdang dang government nung alirtemi aser ano, talisa mozü kidang ketdangsertemi zübazübaa masü saka kanga shisabolua süokia ia inyaktsüla. Tashidak keta lir amato bilemba nisung ka jungjunga reprangtsüba ser nung odang toktsüra, ibaji tashidak aketsang atemaji dang masü saka peisasa lendongi aier asütsü. Aji oda, tanü ama taküm mesamanüba agi nübortemi government aitsü dang mesüra Health Service nung inyakertem mapa nung temulung mesüi nemnemdang jashia pei temeten mebushii nübortem temulung südakja tajungba inyaktsü merangtsüla. Aji oda, akok tashi osangbenertemi metetnubatema ajak shitak ashitsü merangtsüla. Iba jagi dang asenok longjemer iba tashidak wara ya koktettsü.

## OLEMSABANG Ayatai CoronaVirus

I. Tangit Imsong, Tuli Town.

Oh ! Tamamatsü, tetsüputsü Corona Virus,  
Nü tenüng tetezü;

Alima meimchir ajak menatepdaktsüba tasüba wara lir.

Alima nung nungtoko nisung, nungtoko lima

Aser tepur tajung lima aika lir

Saka itemji-a ajakiba mangashi aser memetet.

Saka Oh ! Na Corona Virus alima meimchir

Tulu tila, takar maker, tanur tain ajaki tetsüpu agi na meteta lir

Na ama alima ajak okrongdakja tsüputeptsüsa

Kecha-asüdanga mataloka ni,

Anungji alima matem tashi kodangsa shibai bilemtetdir

Meimchirtem asükshijang merongtsü.

Oh ! Corona Virus nai alima rangben amokshidaktsür

Chubatem aser yimsüsürtem jenokdak maka,

Shisa rama nung tepetzük nütsüng ka den saku jenjangi aludaktsüogo ni,

Nai tulur tilar shinga ajioka mali, Tapayutsü taküm jenti lalutsüogo ni,

Nai tasü mangji anüng ozü aser arem shiruru

Nem chiyongtsü agütsü Yer. 16:4.

Oh ! Corona Virus, na tila ka dang, Saka yimti yimdong ajak

Tsüngdangpi konga azüngmeyakdaktsüogo ni

Anünglak nung yimzüba garitem,

Tzüyim nung jajaba Jahaztem

Ali nung motuzüba talongtsütem

Ajak tagidak maka kümstsüogo.

School, College, University, Tekülem ki

Alima ajak nung nai shipangtsü,

Lokti longsolongben nai senshidaltsü, Shishilemba tesem ajak samatsüogo

Akümlir pokyimdak maka kümdaktsüogo, alima rangben tebelemtsü ka dang,

Amang sangwa memetet ayip majanger.

Ya shiba mechi, Ayatai CoronaVirus.

Alima kinük pzü nung tang otsü mali

T.V lapokra CoronaVirus, Radio lapokra CoronaVirus

Osang kaket lapokra CoronaVirus, Mobile lapokra CoronaVirus

Call süra CoronaVirus tama arur

Lokti senden ajak nung CoronaVirus

Ya kechi sayangtsü Oh ! CoronaVirus.

Alima kin tashi tulutem ajak Bomb aser injang medeni amokmerenogo.

Anü maluba England yimli Chuba dak kongshi

London yimti yimdong hon agi menokba

Menena asür kima manga-a meyimzü ama tütayar mali yiprep aküm

Alima nung tepur tajung yimtitem ajak

Shimak shimaka kümstsüogo ni.

Alima rara tasembuba atema Alima kintemi kanga tsüputepa alidang

Tanü CoronaVirus-i ajak ajatetogo

O lemteptsü sapang maka oshi maka

Nüji mali, temeimji pai memetet

Tejak merepranger aser atsü-anem maker

Ayatai CoronaVirus.

Oha ! CoronaVirus nai meimchir ajak

Taru tao ajaklen teka metsükdaktsür (sanitizer)

Saka tachitsübo maka nung tepang nempangtsür (musk)

Alima meimchir aya agi sümadarji

Joko alimai na sembar aser atakatemer

Aser onok tamang teimla ka lir

Teyanglur Tsüngremi na arüjang Isaiah 25:8

Oh ! Na CoronaVirus Ayatai.

### ANGAJEMTSÜ

Kibuba küm meyi ka noklang ponguser tenemser ka (1551 A.D) nung French nunger Astrologer aser Physician ka tenüng agi Nostradamus-i yamai zülü. -

"Iba jakrep küm 2020 (twin year) nung anüdoklen lima ka nungi Chubatsür ka Corona adoktsü, aser manger mesangwa nung tasü wara (plague) alima sünga proktsü aser nisungtem aot aoyi küma alima raksatsütsü ta ashiba tanü China lima nungi Italy tenem 7 lima tashi tasü wara agi kangshir. Iba ya Tsüngrem O dangi meyipra Yermia kaket 16:4 nung ashiba tanü ataloker ta angatetdi.

Anungji asenok züzüa melili saka Tsüngrem tali bushidi. Süra pai asenok daknungi iba timtem ya agientsü ta shia lir. - Isaiah 25:8. AMEN.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger agateta agitsü mepishir**



## UK nung timtemertem yaritsü atema Arogo 1,000 longjemogo

**London, Rongchii/April 13, 2020:** Tang UK nung coronavirus tashidak kanga bulua prokba ajanga linük tesem balala nung timtem ajangshia alirtem yaritsü atema denomination 40 nungi British Arogo 1,000 longjemogo, ta osang ka ajanga metetdaksü.

National network-YourNeighbour.org website aser call centre ajanga UK nung Arogotemi nungdabapurtem yaritsü. Iba network ajanga parnok lijaliyongba nung yaritsü, pharmacy-i aoba nung yaritsü aser tanga nungdak balala nung yaritsü.

Linük tenzükba tsütsü Arogoi tongti shilem agia arudar aser coronavirus tashidak ajanga timtem ajangshirtem yaria arudar.

Linük nung nungdakpurtem den tongtepratepa anasatiba Arogo ajanga parnok yaritsü atema website tasenba ya Easter Sunday (April 12) nü lapoka liasü.

Iba website ajangasa shisa ramaa timtem ajururtem aser shirangertema yaritsü.

Timtemertem aser nungdabapurtem jangjatsü aser yaritsü atema iba network-i sorkar, National Health Service (NHS) aser tangartem den

külemi inyaka arudar.

Iba project dak sendakba nung Culture Secretary, Oliver Dowden-i, "Easter Sunday nung Arogotem shibanger, ajisüaka Arogotemi maneni nungdabapurtem atema mapa tajung inyakba atema ni pelar," ta ashi.

Easter Sunday nü alima tesem ajaklen Khristantemi online ajanga dang tekülem sentong nung adenba anogo nung YourNeighbour.org ya tenzükogo.

Bishop of Durham, Right Rev. Paul Butler-i, "YourNeighbour.org ya Arogo nung züngsemtem yaritsü mesüra Arogotem den longjemer lokti atema mapa tajung inyaksü asoshi lir. NHS volunteers-i phone call asütsü, chiyungtsü alitsü aser kuli balala ajanga timtem ajangshia alirtem den tongtepratepa alitsü," ta metetdaksü.

Easter Sunday jakdang taoba hopta Arogo lenirtem parnok 500-i, Tenla kitem shibangtsüa akok, saka Arogoi maneni lokti atema mapa tajung inyaksü, ta nangzuka 'Easter pledge to the nation' nung sign süa liasü.

YourNeighbour.org nung Director, Dom Llewellyn-i, "Coronavirus tensa mapang

nung shinga azüngmeyaka meyutsütsüla, anungji teyari nungdabapurtem atema YourNeighbour.org ya lapok. Arogotemi chiyungtsü den tanga nungdak balala agütsür, azüngmeyaka alirtem anepalur aser counseling den teyari balala agütsür," ta metetdaksü.

Paisa, Tenla kitem shibangaka Arogotemi maneni lokti tenzükdar, ta metetdaksü.

Europe nung coronavirus tashidak agi tamajungtiba kongshiba linüktem rongnung UK densema lir.

UK nung aliba hospital tem nung coronavirus tashidak agi asür nisung 10,000 dak tema jungogo. Amongnüa England nung nisung 657 asüba osang sangdong, Scotland nung 24 asü, Wales nung 18 asü aser Northern Ireland nung 11 asü.

Iba tashidak tali prokba nokdangtsü atema Minister temi nüburtem dang Easter Sunday nunga kidang nungi ayazüka malutsü mepishia liasü.

Tang tashi nung Europe nung iba tashidak agi nisung timba asüba linükji Italy linük (nisung 19000 dak tema) lir, iba sülen Spain, France aser UK lir.

Germany nungbo tang tashi nung nisung 2000 dak tema dang asü.

## Pastor temi ketdangsertem tashi angatsüla: Franklin Graham

**April 13, 2020:** Conservative commentator, Ben Shapiro den TV show ka nung jembidang Evangelist, Franklin Graham-i United States nung aliba pastor tem dang, Tsüngremi tenyaba mapa maneni inyakba den külemi COVID-19 tashidak nungi kümzuka alitsü atema ketdangsertem tashi-a angatsüla, ta ashi.

Graham ya Samaritan's Purse nung CEO aser President lir.

Daily Wire tentetsang, Shapiro-i Graham dang, coronavirus tashidak tensa nung na, ner kibong aser ner organization-i kechi inyakdar?, ta asüngdangba langzüdang Graham-i, "Onoki akhi ama maneni inyakdar," ta langzü.

Coronavirus tashidak bulua prokba nokdangtsü atema Arogotemi Tenla kitem shibangba dak sendakba nung

Shapiro-i asüngdangba langzüdang Graham-i, "Asenoki ketdangsertem tashi angatsüla. Laishibai asenok dang iba tesayubaji agütsür," ta ashi.

Alima nung sayutsüngir nungtugu, (asür) Billy Graham'er jabaso, Franklin Graham-isa, "Arogotem meshibang. Tenla kidang adenshir tekülem sentong nung adenertem dang nunggibo online ajanga tekülem agiba sentong nung nisung timba dendar, ta ni amanger," ta ashi.

Graham-isa, "Arogoji maneni Arogo asütsüla, ajisüaka ni linük (US) nung pastor tem dang ketdangsertem tashi angatsüla, ta ajungshir. Ajioda Arogo züngsemtemia asenok dang nungi ibaji imlatsü," ta ashi.

Paisa, "Iba tashidak ya kanga majung, talisa tashidak balala keta alirtem atema

majung. Iba (Covid-19) ya tasüba temerenshi obendang agütsüba den kasa lir," ta ashi.

Graham-isa, Khristantemi Tsüngremer tenyaba mapa maneni inyaksüla, ajisüaka asenoki tangar anasai moi yimya balaka nung kanga kümdanga Tsüngremer tenyaba mapa inyaksü akok, ta ashi.

Paisa, Samaritan's Purse teloki Italy linük dangi healthcare professionals aika yokogo, kechiyong linük aikati Italy meyarir, ta metetdaksü.

Amongnü tashi nung alima nung nisung million 1.8 dak coronavirus tashidak putetogo aser nisung 108, 902 shi süogo, ta Johns Hopkins University Coronavirus Resource Center osang ajanga metetdaksü.

United States kija nunga nisung 530,000 dak iba tashidak putetogo aser iba nungjagi nisung 20,608 süogo.

## ANOGO ABEN TSÜNGREM DEN

### YA NI MASÜ

Küm noklangzüng 20 buba nung kentenba telok nung liasü. Tangar ka nem tenüngsang agütsütsü tim nung pai agütsüba ajanga pa tali nungtuku aküm. New Yorknung Philharmonic Orchestra telok nungtugu akümbaji Arturo Toscanini-i aniba ajanga liasü ta David Eweni pa kaket Dictator of the Baton nung zülu. Beethoveni mejemba Ninth Symphony ken atandang ola madoki anga aser lokti jagi teka sashia matena agizük. Idangji Arturo tenük nüktsü agi tsünggranger ola madokteti ashi, "Ya ni masü...ya Beethoven! Toscaninibo kecha nunga ta pai ayimotsü.

Tenyar Pauli züluba kaketterem nung, paia pai inyakba atema teyak masang mesüra nüngsanga magi. Pa tanela tebu ka ama pa ajanga jentipuri khrista agizük. Pai ashi, Tsüngrem taochi agi tang ni kechi yamaji lir. Aser pai kü nem agütsüba taochi amajok maküm. Ni meranga inyakogo, timtema aika ajangshio (tk 10) Pa tamang, temeim aser shisatsü indang jembidang iba nüngsangji pai magizüktet.

Iba lai o azünger ajak dangi Pauli ashiba ama, "Ya ni masü temeimbatem. Saka khrista ... nibo kecha nunga ta asenokia shidi. Atangji asenokbo osangbener dang. Kechisarina asoshi Tsüngrem nem dang tetushi agütsüti.

Tazüngtsü: 1 Korint 15:1-11

Ni ano taküm mali, saka kü dak Khrista taküm alir. Galatia 2:20.

## Nigeria nung pastor ka densema nisung pezü khaset

**April 13, 2020:** Nigeria linük nung Fulani herdsman kiralongrartemi Evangelical Arogo ka nung pastor ka kidang pastor den Arogo züngsem asem khaset, ta Christian persecution watchdog osang ka ajanga metetdaksü.

April 7, 2020 aonung Plateau State's Bassa County kübok Ngbra Zongo yimdak Evangelical Church Winning Arogo nung pastor, Matthew Tagwai'er kidang Fulani kiralongrartemi Khristantemji khaset.

Iba tatalokba tesem anasa alir ka tenüng agi, Patience Moses-i, "Fulani kiralongrartemi Khristantem amak. Kasa tatalokba nungsa Khristan ana yiru aser tenaji tang Dantako yimdak aliba hospital ka nung yaridar," ta metetdaksü.

Pastor Mathew ji arishi küm 34 liasü.

ECWA general secretary, Rev. Yunusa Nmadu, Jr.-i, "Tang atalokba ya-a taoba mapang tatalokbatem ama sashia aitsütsü tetemsü. Kuli kecha makai Khristantem maneni amaker. Ozü nüburtem kümzüktsü atema ketdangsertemi asalentong yanglua inyaksüla," ta ashi.

2020 küm tenzükter tanü tashi nung West Africa nung aliba linük- Nigeria nung Khristan 400 dak tema tepsetogo.

Taküm January 2 nüa Nigeria nung Boko Haram kiralongrar teloki Arogo ka nung pastor, Lawan Andimi pua liasü

asertesülen tepset.

January 20, 2020 nü pastor, Lawan tepsetba osangji Boko Haram-i par osangbener, Ahmad Salkida ajanga sangdonga liasü. Pastor Lawan Andimi ji koba yimya nung tepsetar mejangjar.

Pastor-i kinüngtsü den tanur tenet toktsür asü.

Pastor-i tatemala par kibong aser külem tenzükertem dang, pa asoshi majeptsüla mesüra shisa mebulutsüla, saka ajak atema Tsüngrem nem dang tenüngsang agüjang, ta mepishia liasü.

Pastor Andimi ya Christian Association of Nigeria (CAN) nunga Chairman teinyakdak liasü.

Anambra nung amenoka aliba International Society for Civil Liberties & Rule of Law (Intersociety)-i sangdong ka ajanga, "2020 küm tenzükter testiiba anogo 93 tsüngda Fulani kiralongrartemi Nigeria nung Khristan 410 tepsetogo," ta metetdaksü.

2015 küm nungi tenzükta tanü tashi nung Nigeria nung Khristan 11,500 shi tepsetogo, ta Intersociety-isa metetdaksüogo.

Nigeria linük nung kiralongrar teloktem aser Muslim yimsü alia amangertemi nisung jenti tepseter, saka sorkari ibaji menokdangtetba ajanga yaküm December ita nung Nigeria linük ya U.S. State Department indang "special watch list" linüktem rongnung züngokogo.



Yaküm April 23 nü Sri Lanka yimtiba, Colombo nung sepaitemi St. Anthony Tenla ki anükba noksa nung angur. Yashi (April 12, 2020) Easter Sunday nung jembidang Sri Lanka Cardinal, Malcolm Ranjith-i, yaküm Easter Sunday nung Tenla ki asem den hotel amakba mapang nung Khristantem timba ser nisung 279 asüba tatalokba atema Arogoi Islamic kiralongrartem dang tai tokogo, ta metetdaksü.



**OLONG PAITEP # 5427**

	1			2	3				
4			5						6
					7				
	8								
	9			10			11		
					12			13	
14									
					15				
		16							

<b>TIPIEN</b>		<b>LANGTSÜNGLEN</b>	
2. Sü jeplok	- (4)	1. _ _ _ _ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _ _ _ _ _ kibur	- (5)
15. Mejanga onü	- (5)	13. Tebur tembar tsüngda	- (4)
16. Tzü shiruru ka	- (4)	jatepba	- (4)

**OLONG PAITEP # 5426 TELANGZÜBA**

<b>TIPIEN :</b>	<b>LANGTSÜNGLEN :</b>
1.Lemsa, 3. Osang, 5. Mezüng,	1. Lamem, 2. Sangken, 3. Omen,
6. Agi, 7. Süra, 8. Tebutem,	4. Asüküm, 7. Sendong, 8. Tejang,
9. Amen, 12. Odi, 13. Asayar,	10. Tanga, 11. Tazü.
14. Angsü, 15. Agima.	

**LOCKDOWN MAPANG TEMEYOKTEP PARTY KA NUNG TETSÜR KATI ALOKBA DANG ASÜNGDANGER :**

Hi!!! na kibong kümer süra kechiba Wedding ring temeyong tai nung inok na ?

Aji oda... Ongko ka lirja, tetezü... ni tetsür tai ka den ang sadi asüba temaitsü!!!!

**TANÜBO NAI LANGZÜANG**

Q. Zojila ya koba tesem nung lir?  
 A. Ladakh                      B.Jammu  
 C. Himachal Pradesh        D.Uttarakhand  
 (Taruba adok nung onoki langzünsü)  
**YASHI ADOK TELANGZÜBA : SCTIMSTd**

**Tepela Tasoba Anogo**

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

1. Tenüng : .....  
 2. Tasoba anogo: .....  
 3. Küm : .....                      4. Class : .....  
 5. School : .....  
 6. Talidak : .....  
 7. Salem osang : .....

**NAI-A YA METETTER MA?**

**'MARCH 2020' ITA SPOTIFY NUNG SAPUA ANGABA POP KEN KAR:**

1. Selena Gomez	Boyfriend
2. Dua Lipa	Break My Heart
3. Alan Walker, Ruben	Heading Home
4. Selena Gomez	Souvenir
5. Lady Gaga	Stupid Love
6. Selena Gomez	She
7. Ava Max	Kings & Queens
8. Harry Styles	Adore You
9. Kygo, Zara Larrson, Tyga	Like It Is
10. Lewis Capaldi	Before You Go
11. Camila Cabello, DaBaby	My Oh My
12. Black Eyed Peas, Ozuna, J.Rey Soul	Mamacita
13. Harry Styles	Falling
14. Dua Lipa	Hallucinate
15. Demi Lovata	I Love Me

**SUDOKU # 5469                      TELANGZÜBA # 5468**

	5			9		2		8	3	9	7	4	1	2	5	6	
		1			2	4		7	4	6	9	2	5	3	1	8	
4			6		7	5	8		2	5	1	8	3	6	7	9	4
7	1		8			6	4		1	7	5	4	6	8	9	3	2
							5		4	9	2	5	1	3	6	8	7
	4					2	3	1	3	6	8	2	7	9	1	4	5
8			2			9	6	4	9	2	3	6	5	4	8	7	1
		4		8			5	2	5	1	7	3	8	2	4	6	9
		2		5		7			6	8	4	1	9	7	5	2	3

**OJANG LUTEP # 5017**

HIS : □□□  
 ÜAZ : □□□  
 NGNU : □□□□  
 ANDG : □□□□  
 SÜMA : □□□□  
 KSAA : □□□□  
 ANTELA : □□□□□□  
 NGNUA : □□□□□  
 SALEMAKSA : □□□□□□□□  
 SÜLALITA : □□□□□□□□

**OJANG LUTEP TELANGZÜBA # 5016**

**TEMENEM TAA TASÜBA TA METETSÜMONGA MEIMCHIRI KECHIBA TEYANGLUR MATSÜNGDANG AIBELENER**

**TAN HOPTA ATEMA - KOMA SÜLA ?**

Q. Nagaland nung alirtembo joko pei mapai akhi ama aotsü saka ano ita ka Nagaland alema shinga maotsü aser Nagaland-ia shinga marudaktsütsü ta asununga koma süla ?





New Delhi, April 13, 2020: Hombarnü New Delhi nung Union Information & Broadcasting Minister, Prakash Javadekar-i mask ka agir pa leniba nung senden ka amenba noksa nung angur. Linük anogo 21 shibangtsü atema sangdongba sülenbo tanü mezüing sorkar office tem tera lapokogo.

### Tanep 10:00 ako nung PM Modi-i linük nüburtem den jembitsü **CORONAVIRUS ANEMA MANENI LINÜK SHIBANGTSÜA AKOK**

**New Delhi, Rongchii/April 13 (Agencies):** Mongolbar (April 14) anepdang 10:00 ako nung Ato kilonser, Narendra Modi-i linük nüburtem den jembitsü, ta Hombarnü Prime Minister's Office (PMO) osang ajanga metetdaksü. India nung coronavirus tashidak bulua prokba nokdangtsü atema linük tesem ajak anogo 21 tashi shibangtsü Ato kilonseri sangdonga liasü aser anogo 21 ji Mongolbar abensar, ajisüaka Modi-i maneni anogo aika atsülanga linük shibangtsü atema

sangdongtsü-a akok. "April 14, 2020 anepdang 10:00 ako nung Ato kilonser @narendramodi-i linük (nüburtem) den jembitsü," ta PMO-i twitter ajanga metetdaksü. Coronavirus onük dak sendakba nung taoba ita Ato kilonser-i March 19 nü aser March 24 nü-a linük nüburtem den jembia liasü. March 19 nü Modi-i coronavirus anema raratsü atema telemtetba agitsü ayongzükba den külemi March 22 nü (Amongnü) 'janta

curfew' sangdonga liasü. March 24 nü pai coronavirus tashidak kanga prokba nokdangtsü atema linük tesem ajak anogo 21 shibangtsü sangdonga liasü. Video osang ka ajanga April 3 nü Ato kilonser, Modi-i nüburtem dang, coronavirus tashidak tamakok ngudaktsütsü atema nüburtemi melungtetba temaitsü April 5 aonung 9:00 ako nungi tenzüka minute 9 tashi pei kidang light shibanger milen, candle mesüra mobile tsükloktsü mepishia liasü.

### State troki April 14 sülen-a maneni shibangtsü sangdongogogo

**New Delhi, April 13 (Agencies):** Coronavirus tashidak nokdangtsü atema India linük tesem ajak anogo 21 shibangtsü atema sangdongba sülen anogo 21 ji asüing (April 14) abensatsü lia state sorkar aikati April 30 tashi maneni peipei state shibangtsü sangdongogogo. Tang tashi nung state 6-Odisha, Punjab, West Bengal, Maharashtra, Telangana aser Karnataka state sorkartemi coronavirus prokba nokdangtsü atema maneni state shibangtsü sangdongogogo. Taoba hopta Ato kilonser, Narendra Modi chief minister tem den video conference alidang chief minister aikati Modi dang ano hopta ana maneni linük shibangtsü atema mepishia liasü. April 14 nü sülen-a maneni shibangtsü atema sangdongba

state tem: Odisha: April 9 nü Odisha state-i mezüing ano hopta ana state shibangtsü sangdonga liasü. State cabinet senden ka amenba sülen Chief minister, Naveen Patnaik-i senden nung telemtetba agibaji metetdaksü. Paisa state nung school aser tanga shisaliok reju ajak June 17 tashi shibangtsü, ta sangdongogogo. Punjab: April 10 nü Punjab-ia May 1 tashi state maneni shibangtsü sangdonga liasü. Punjab Chief Minister, Captain Amarinder Singh-i twitter ajanga, "Covid19 tensa nung ajemdaker Cabinet-i May 1 tashi maneni state shibangtsü aser curfew alitsü lemtetogo," ta metetdaksü. Maharashtra: Modi den chief Minister tem senden amenba sülen kobi meli

Maharashtra chief minister Uddhav Thackeray-i, tesem karbo lapoktsütsü saka tanüingba tesemtem ano tesashiba shibangtsü ta metetdaksü. Telangana: April 11 nü chief minister K Chandrasekhar Rao-i, coronavirus tashidak kanga bulua prokba state, Maharashtra den Telangana state arrtsü talangka lir, anungji state kümzüka alitsü atema April 30 tashi shibangtsü, ta metetdaksü. West Bengal: April 11 nü West Bengal sorkaria April 30 tashi shibangtsü lemtet aser June 10 tashi state nung shisaliok reju ajak shibangtsü sangdongogogo. Karnataka: Honibarnü Karnataka chief minister, BS Yediyurappa-i, state nung iba tashidak prokba nokdangtsü atema ano maneni hopta ana shibangtsü ta sangdonga liasü.

### Ghonda 35 tsüingda nisung 796 dak Covid-19 putet: Health Ministry

**New Delhi, April 13 (Agencies):** Hombarnü Health & Family Welfare-i, tesüiba ghonda 24 tsüingda novel coronavirus tashidak agi shiranger nisung 141 anepadokogo, ta metetdaksü. New Delhi nung osangbenertem den jembidang Health Ministry nung Joint Secretary, Lav Agarwal-i, "Tang tashi nung linük nung nisung 9,152 dak Covid-19 putetogo. Tesüiba ghonda 24 nung iba tashidak agi shiranger 141 anepadokogo. Ibaji densemabo tang tashi nung linük nung iba tashidak agi shiranger ajak agi parnok 857 taneptsü nguogo. Yashi nungi tenzüka tang tashi nung nisung 796 dak iba tashidak putet aser kasa mapang nungjisa nisung 35 süogo," ta metetdaksü. Osangbenertem dang Agarwal-i, iba tashidak nokdangtsü atema sorkari asalentong yanglua inyakbatem nükjidong atalokdar, ta metetdaksü. Agarwal-isa, "Tesüiba anogo 14 nung state 15 nungi district 25 nungbo iba tashidak

agi shiranger tasen maliasü. Item districts ji Maharashtra kübok Gondia, Chhattisgarh kübok Rajnandgaon, Durg, Bilaspur, Karnataka kübok Davangiri, Kodagu, Tumkuru, Udipi, South Goa, Kerala kübok Wayanad aser Kottayam, Manipur nung West Imphal, Jammu & Kashmir kübok Rajouri, Mizoram nung Aizawl West, Puducherry kübok Mahe, Punjab kübok SBS Nagar, Bihar kübok Patna, Nalanda aser Munger, Rajasthan kübok Pratapgarh, Haryana kübok Panipat, Rohtak, Sirsa, Uttarakhand kübok Pauri Garhwal aser Telangana kübok Bhadradi Kothagudem district tem lir," ta metetdaksü. Paisa, iba tashidak atema sorkari tenzüka technology app- Aarogya Setu tang tashi nung nisung crore 3.5-i download süogo, ta metetdaksü. Aarogya Setu ya India sorkari yangluba mobile application ka lir, koba ajanga nüburtem nem nungdakba health services agitsütsü atema metetpelatetsü/tongteprateptetsü.

### Punjab nung police ka teka lepdoktsüba atema nisung 9 apu



New Delhi, April 13, 2020: Hombarnü North Block, New Delhi nung Union Finance Minister, Nirmala Sitharaman-i kidang yangluba mask ka agir office mapa tenzüka noksa nung angur.

### Kashmir nung kiralongrartemi police ketdangser ka khaset

**Srinagar, April 13 (Agencies):** Hombarnü Jammu & Kashmir kübok Kishtwar district nung kiralongrartemi amakdang Special Police Officer (SPO) ka khaset aser ka yiruogo, ta police ketdangser kati metetdaksü. Hombarnü nung Dachan jila kübok Tandar yimdak tezülen kiralongrar kari duty nung aliba SPO ana amakba mapang nung ka khaset aser ka mejungi yirutsüogo, ta kasa osang ajanga metetdaksü. Jammu & Kashmir nung Special Operation Group yagi telungpurtem anema operations aoer. Police ketdangser ana amakba sülen parnoki rifles ana

rakzüker ao. Security sepaitem meyong prangpong den raraba hadir balala razüka bener aotsü atema Kashmir nung kiralongrartemi sepaitem amaker. Kiralongrartemi aiben police mesüra CRPF sepaitem amakba sülen parnok indang prangpong rakzüker ajener, ano khenkenbo police tem samar aser tesülen kiralongrar/telungpur telok kar nung adener. Yashi-a (April 12) Kashmir kübok Kulgam district nung kiralongrartemi army nungi anisüngzüker alir ka dak injang khaloktsü. Paji Srinagar nung aliba hospital kati ani ao saka mekümzükteti Hombarnü süogo.



Visakhapatnam, April 13, 2020: Hombarnü Visakhapatnam nung Indian Navy Dockyard-i District administration nem agütsüba Portable Multi-feed Oxygen Manifold (MOM) noksa ka yangi angur. MOM ya India Navy Dockyard-i design süa yanglu. MOM yagi khenyongi shiranger nisung trok nem oxygen agütsütetsü.



## Ecuador nung police temi tasü mang 800 jungnüa remogo

**Guayaquil, Rongchii/April 13 (Agencies):** Ecuador nung coronavirus tashidak wara ya

Guayaquil tesem nung tesashiba pokteta lir, kong taoba hopta police temi nisung tasü mang 800 jungnüa arem.

Pacific tsütsü rong anenba yimti nung nisung tasü mang anepalurtemi mayimjemeteter, aser yangji alirtemi social media nung video prokshiba nung nisung tasü mang yimtung nung aliba nguogo.

"Taskforce temi nisung aliba ki nungi tasü mang bendenba 700 dak tema liasü," ta COVID-19 agi timtemer anepalutsü asoshi sorkari tentetba police aser mitkar temeyoktep telok ka nung tanishir Jorge Wated-i ashi.

Pai Deobarnü Twitter ajanga lemsatepba agi, joint taskforce ajanga taoba hopta asem tsü ngda nisung aliba ki nungi nisung tasü mang 771 ngutet aser mozüki nungi nisung tasü mang 631 ngutet, kong tasü mang ayodak sü ngadoker liasü.

Asürtem ya kechi ajanga asürar Wated-i mashi saka item rongnung nisung 600 bo ketdangsertemi arem.

February 29 nü coronavirus

## Spain nung tendokangba ajema kümogo

**Madrid, Rongchii/April 13 (Agencies):** Coronavirus agi tamajungtiba kongshiba linüktem rongnung Spain ya ka lir, kong linük ajunga shibangba agi rongsenketsü ng mejungi küm daksür aliba tanaben shia arudaksütsü mechi tenokdangba ajemdaksütsü tenzü kogo.

Osettsüset tabu balala yangluba, ki-o-jen yangluba aser tanga mapa kar nung inyakba nisungtem mapai tanaben aotsü melaogo, saka safety guideline tem sashisashia agütsür.

Tanü ngba nütsü ng yongsük ajunga kidang dang alitsü.

Spain nung COVID-19 tashidak wara agi nisung 17,500 shi süogo saka iba tashidak menatepa aoba tajemba akümer.

Europe continent kübok nung Italy tamajungtiba kongshia nisung 19,900 jungnüa süogo, kong Mongulbarnü nungi tenzüka firm kar lapoktsü.

Spain indang health ministry ajanga Hombarnü ashiba agi, anogoshi nisung asüba tera ajema akümer, kong tesüiba ghonda 24 tsü ngda nisung 517 asü, saka Deobarnü sangdongba mapang ghonda 24 tsü ngda nisung 619 sür liasü. Tang iba linük nung coronavirus tasenb agi asür

mezü ng putetba sülen Ecuador nung nisung 7,500 dak puteta lir.

Item rongnung tzükümlen aliba Guayas nungi shilem 70 dak tema lir, aser province yimtiba, Guayaquil nung nisung 4,000 dak putetogo, ta sorkari ashi.

Guayaquil nung nisung tasü mang bendenba ayuba tesem asü ngba sülen hopta asem lir mitkar aser police temi nisung tasü mang kidang nungi bener ao tenzü k, aser ghonda 15 curfew benokba ajanga forensic service aser asü pila sentong magiteti aküm.

Guayaquil nung alirtemi social media nung video prokshiba nung yimtung nung nisung tasü mang tashishir maka aliba angu aser kinungertem aremstü asoshi teyari meshia liasü.

Asür indang kinungertemi kuli balala ajanga tasü mang meremetetba mechi Ecuador sorkari item tasü mang aremstü mapa tenzü k.

Guayas province kija nunga ita ishika tsü ngda nisung 2,500 aser 3,500 tsü ngda COVID-19 tashidak agi asütsü, ta medical expert temi ashir, ta Wated-i April ita tetenzüklen shia liasü.

ajak agi 17,489 lir.

Nisung tasen dak iba virus menaba maneni ajema akümer, kong tesüiba ghonda 24 tsü ngda nisung 3,477 dak puteta tang linük nung nisung 169,496 dak iba tashidak jangjatetogo.

"Takok angutsü ano mapang talangka lir," ta Ato Kilonser Pedro Sánchez-i Deobarnü ashi.

"Asenok ajaki tanaben kima yimtongi oner...saka iba dang nungi asen tejangraba tulutibaji iba rara nung takok angutsüba ya lir," ta pai ashi.

Sorkari March 27 nung tenokdangba agüja aliba kar Hombarnü sayaja kidang nungi meinyakteterem mapa inyakba tesemi oa inyaksü mela.

Ketdangsertemi public transport nung face mask million 10 lemstütsü temolungtetba lir.

Germany nung COVID-19 agi nisung 3,022 süogo aser Netherlands nung nisung 2,823 süogo.

Tang tashinung Comoros, Kiribati, Lesotho, Marshall Islands, Micronesia, Nauru, North Korea, Palau, Samoa, Sao Tome and Principe, Solomon Islands, Tajikistan, Tonga, Turkmenistan, Tuvalu aser Vanuatu linüktem nung novel coronavirus tasenba putetba osang mali.



New Zealand Ato Kilonser Jacinda Ardern (abelen) aser Director-General of Health Ashley Bloomfield nati Wellington, New Zealand nung April 13, 2020 nü osangbener senden ka nung jembiba noksa nung angur. New Zealand nung COVID-19 agi nisung pongububa süogo, ta Ministry of Health ajanga Hombarnü metetdaksü. Hombarnü New Zealand nung coronavirus nisung 15 dak tejangja putet aser nisung pezü dak temolung melemi lir aser item ajak senteper nisung 1,349 jungogo.

## COVID-19 agi Iran nung nisung 4,585 süogo

**Dubai, Rongchii/April 13**

**(Agencies):** Iran nung coronavirus tashidak wara agi asür nisung 4,585 jungogo, kong manger sangwadang nisung 111 tali asü, aser iba tashidak menar alir nisung 73,303 jungogo, ta ketdangsertemi Hombarnü ashi.

Deobarnü sorkari Iran nung province balala nung yimti balala tsü ngda senzusempongba nokdanga alibatem agien aser province ka nungi kati aoba nokdanga aliba April 20 nü sayatsü, ta state media ajanga ashi.

"Virus menar alir nisung 45,983 taneptsü nguogo... Tesüiba ghonda 24 tsü ngda nisung 1,617 dak COVID-19 putet," ta Iran indang health minister nung adviser, Alireza Vahabzadeh-i Twitter nung zülutsü.

Health Ministry odongtar

Kianush Jahanpur-i Iranian state TV dang ashiba agi, coronavirus agi meneper alir tem rongnung nisung 3,877 bo lendongbang nung lir.

Honibarnü nungi tenzüka yimti aika nung 'low-risk businesses' tem lapokba sülen bus aser subway nung nisungtem mesemi nungtepba state TV ajanga sayu, saka linük yimtiba, Tehran nungbo April 18 nungi ang lapoktsü.

COVID-19 tanaben arua Tehran nung kanga sashia kongshitsü, ta health ketdangser aser mongintemi sorkar dang tekümdangtsü shiogo. Coronavirus Taskforce of Tehran nung tekolakba, Alireza Zali-i nüburtem dang kilung nung alitsü ajungshir.

Movie ajiba tesemtem, tzüwaba tesemtem, saunas, beauty salons, kaket reju, shishilempaba tesemtem aser restaurant tem ano melapoki lir.

Iran nung yimsü asür putirtemi iba tashidak azüoktsü makoker, aser nüburtem inyaksangshi ajemdaksüba ajanga US-i tenokdangba agüja aliba economy tamajungba akümtsü, ta shisabulur.

"Asenoki coronavirus aser tenokdangba agüja aliba virus den külemi raratsüla," ta sorkar indang odongtar Ali Rabiei-i ashi.

Tashi tait linük trok den 2015 nuclear deal yangluba nungi 2018 küm US Tir, Donald Trump-i par linük agiena Iran nem tenokdangba tanaben agütsüshi.

Item tenokdangba ajanga linük nung tashidak wara den raraba nung tetsükdaksü ajurur, ta Iran ketdangsertemi US tenü ng asener. Saka iba coronavirus tashidak wara nokdangtsü asoshi Washington-i teyari agütsüba Iran lenirtemi magizük.

## South Korea nung taneptsü ngur alirdaka puteter

**Seoul, Rongchii/April 13**

**(Agencies):** South Korea nung coronavirus tasenba nungi taneptsü ngur alir nisung 116 dak maneni iba tashidak putet, ta Hombarnü sangdong ka ajanga ashi, kong iba tashidak wara nungi nokdangtsü mechi tenokdangba agüja alibatem kar agentsü tebilemba lir.

Hombarnü South Korea nung nisung 25 dak dang COVID-19 tashidak ya puteta liasü, saka taneptsü ngur alirtem tanaben shirangba ajanga linük nung iba wara samadaksütsü merangba nung tebilemstü tali adoker.

Ketdangsertemi iba tashidak tanaben adokshiba indang tang tashi bushisü ngdang südagi. Saka Korea Centers for Disease Control and Prevention (KCDC) director Jeong Eunkyong-ibo shiranger dak tanaben menaba masü saka virus ya tanaben shia aruba südi, ta ashir.

Mongintem karibo

tendangba nung aibelenba mesüra shiranger temang nung virus ya alitsü südi ta ashir.

South Korea nung hopta ka tejakdang nisung 51 dak iba virus tanaben butet aser tang anasü agi timba küma nisung 116 dak puteta lir.

US Tir, Donald Trump-i mepishiba sülen South Korea-i Mongulbarnü United States dangi coronavirus tendangba kit 600,000 yoktsü sentong lir, ta Seoul nung ketdangser kati Hombarnü osangbener dang ashi.

Sorkar leniryemi South Korea nung dang maneni totuyuba sülen anidaka aser lokti adenshiba nokdangtsü ajungshir, saka mapang talangka melie item tenokdangba ajemdaksütsü amai shisem.

South Korea nung April 19 tashi kilung nungi malutsü ozü ng agütsü, saka COVID-19 tashidak putetba nung ajema akümba aser tzüngsang mopung

tajungba akümba sülen nisung aika totuyuba sülen manidaki akümer.

Hombarnü disaster management senden ka nung Ato Kilonser Chung Sye-kyun-i ashiba agi, sorkari yakta tenokdangba ajemdaksütsü asoshi repringtsü, kong nüburtem dang kilung nung alitsü, lokti senden kata nunga madentsü aser nü ngdak makaba nung kimaleni motsü shia lir.

"Hopta tatemlen asenoki social distancing campaign asadangtsü aser tanga safety measure kar dangi melentsü asoshi jembitsü," ta pai ashi.

Tesem balala nung sorkari kari tenokdangba tesashiba agüja bar aser nightclub tem shibangdaksü, lokti tulu adenshima nokdanga tekülem senteptema ajema küm daksü.

Tenokdangba ajema kümaka iba wara mepoktetba mapang ama linük nung sadoksayima melitetsü, ta Chung-i ashi.



# Bendanger atema visa o e-visa April 30 tashi atsülangtsür

**Guwahati, Rongchii/April 13, 2020 (Agencies):** Hombarnü, Ministry of Home Affairs ajanga India nung pei pei talidaki moteti alir bendangertem parnok tang talidak amungtsü aser parnok visa den e-visa tem taa medeni April 30, 2020 tashi atsülangtsüogo, ta sangdong ajanga metetdaksü.

COVID-19 aziöktsü asoshi March 24, 2020 nü India tesem ajunga nung maparen ajak shibangtsü asoshi ozüing agütsüba sülen linük nung bendanger aika pei pei talidaki moteti mungdar.

"Alima tesem aika nung Covid-10 wara prokshiba ajanga India nung tekolakpurtemi bendanger mesüra külem sensopur ainlen senzusenpongtsü asoshi tenokdangba agütsüba ajanga linük nung pei pei talidaki moteti alir bendanger tem, shirnok indang visa, e-visa den parnok India nung alitsü/amungtsü asoshi anogo süiogo, online ajanga parnoki (bendangertem)

tongtepratepba sülen GRATIS inyakyim ajanga visa aser e-visa tem April 30, 2020 tashi atsülangtsür," ta ministry sangdong ka ajanga metetdaksü.

Taoba ita, India nung iba wara prokshiba aziöktsü asoshi raliwalir ajak indang Visa tem April 15, 2020 nü tashi thitsütsü asoshi Centre-i lemteta liasü.

India nung COVID-19 wara ajanga nisung 324 süogo aser iba wara puteta alir nisung 9,352 tashi kümogo, ta Union Health

Ministry sangdong ajanga metetdakja liasü.

COVID-19 aziöktsü asoshi, sorkari medical kisü jenstütem talisa iba wara agi kangshirtem anepalutsü mozüki, yipden, ICU yipden aser quarantine facility tem bendenloktsütsü asoshi asalentong yangludat.

Tezü tesemtem nung medical kisü jenstütem timba kümstütsü asoshi, Ordnance Factory Board ajanga tent tem yangludat, ta kasa sangdong ajanga metetdaksü.

## OFFICE OF THE UNGMA VILLAGE COUNCIL

MOKOKCHUNG : NAGALAND

Date: 13<sup>th</sup> April 2020

### SANGDONGER

Ungma Village Council ajanga osang ka yamai lemsateper. Alima tensa mapang dak apir, wara tesashi nungi kümzüka ayutsü asoshi Ungma senso shinga yim adena aotsü mesüra bendanglen nungi arutsü memelar. Anungji, item ajak reprangshimtsü asoshi Ungma litsü nung oliorar gari mesüra nüja senzür ajak kuli jangjatsü atema asüngdangyatsü. Senzusenbonger ajaki mejashi-i yimya tajungtiba nung kuli tejangja agütsütsü mepishia sangdonger.

Sd/-  
**Alemtoshi Imsong,**  
Chairman,  
Village Council Ungma.

Sd/-  
**Imtisungkum Longkumer,**  
Secretary,  
Village Council Ungma.



Dimapur, Rongchii/April 13, 2020: District Administration aser Shamator Town Council den külemi Town Municipal longjemer Shamator jila kübok ki ka nung mesen asütsü atema mozützü khaloktsüyonga aoba mapang tangokba noksa ka angur.



Aoyimkum village council i COVID19 wara mapang yimtsung nubor nem wholesale rate agi jang agatsüba noksa nung angur.



Dimapur, Rongchii/April 13, 2020: Assam aser Nagaland arrtsülen Shutap check gate nung nurse kati nisung ka screening agiba noksa nung angur.



Dimapur, Rongchii/April 13, 2020: Aboi Sub-Division kübok VDB aser VCC Association nati COVID-19 anema raratsü asoshi Lithrila Sangtam EAC aser BDO Aboi na matsüngdang Aboi ADC, Ajit Kumar Ranjan, IAS nem sen 50, 000 tenla agütsüba mapang tangokba noksa ka yangi angur.

# Mulungnen O



**Asür Taliwati Longkumer**  
30.12.1964 - 04 04.2020

Onoki teti meima aliba Asür Taliwati Longkumer (Molungyimsen), pa shirangdang aser pa asüba anogo tashi nung kija aser kibong, Arogo, tembartem, kiyongkinartem shirnokisa rongsen, nübo, tenla aser sarasadem agi nungita ozü tako marok koktetsüsa onok nem tesünep agütsüogo, nenok ajak dang tsüngdong arua pelaba meshitetaka asen tulusang Tsüngremi nenok ajak moajangma ta ozü tamang sarasadem.

Maneni onoki itemdang pelaba shisemer:

1. Dr. Manong, Nurses & Staff of Zion Hospital, Dimapur
2. Mrs. Achila Tarep
3. Mr & Mrs. Anungba Sanglir
4. Mr. James Odyuo
5. Mr & Mrs. Lanukümzuk Tzüdir
6. Mr. Orenthung and Brothers
7. Mrs. Watila Belho
8. Dimapur Ao Baptist Arogo
9. Molungyimsen Senso Telongjem, Dimapur
10. N.S.T Department, Dimapur
11. N.S.T Colony Youth, Dimapur
12. N.S.T Colony Lotha and Sumi Community, Dimapur

~ Temeim Kinüngtsü aser Jalatem.

## OFFICE OF THE MOAYIMTI VILLAGE COUNCIL

BPO Mangkolemba, Dist. Mokokchung Nagaland

Ref. No ..... Date: 13<sup>th</sup> April, 2020

### TEPELA LEMSATEPER

Tanü alima ajunga nung Corona Virus tashidak adoka meimchir taküm jenti samab lendong nungi kümzütsü atema State Sorkari osang agütsüba den District Administration tetuyuba ama ozü Moayimti Medemsanger Putu Mendeni sungküm shipanger bendanglen nungi shinga marudaktsür aser yimdaklira süngküm atena shinga meyoker ta aliba mapang 8th April 2020 anogo nung Wb. Temjen Imna Along Minister of Higher & Technical Education aser Tribal Affairs Govt. of Nagaland & President BJP Nagaland State, aser Wb. Dr. Longri aser I/c of Mokokchung district on Covid-19 tenadi yimdak anogodok ayangertem aser makamaitertem nem jang aser aonsotsü lema agütsüba asoshi ozü yimten aser shirnoki iba teyari agiogo ajaki pelaba lemsateper.

Tsüngremi Yimsüsertem taküm kipong aser nubur kümzüka ayutsü wadang maneni moajangma.

Sd/-  
**Wb. Satemkaba**  
Chariman, MVC

Sd/-  
**Wb. I. Rongsen Wallng**  
Council Secretary, MVC

## OFFICE OF THE AKUMEN VILLAGE COUNCIL

Dist- Mokokchung : Nagaland

### PELABA LEMSATEPER

Shri. Temjen Imna Along, Minister of Higher, Technical Education & Tribal Affairs ajanga iba Lockdown mapang nübor timtem angateta 30th Alongtaki constituency ajonga nung nübor nem janga den aonsotsü agütsüba asoshi Akumen yimsüsüri kanga pelaba metetdaksür. Tsüngremi asen lenir nem shisatsü aser taküm maneni moajangma.

Akumen nütsüng nüboritemi social media aser osang kaket balala nung tim masüba osang shiri agütsüdir/züludir Akumen yimdeni tatem tonga bushitsü aser tapet merenshitsü.

Sd/-  
**Tongpanglemba**  
Chairman  
Akumen Village Council

## OFFICE OF THE TSUREMMEN VILLAGE COUNCIL

P.B.O. Longchem, P.O. Mangkolemba  
Mokokchung : Nagaland - 798604

### PELABA LEMSATEPER

Alima ajunga nung COVID-19 wara noktangtsü shipanger nübor timtema alidang Shri. Temjen Imna Along, Minister of Higher Technical Education & Tribal Affairs, ajanga ozü Tsuremmen yimtsüng nung timtemer kibong nem teyari jang, totzü aser aonsotsü agütsüba asoshi Tsuremmen yimdeni kanga pelaba lemsateper. Tsüngremi nü taküm, sempet aser rongsen maneni moajangma.

**S. Mar**  
Chairman  
Tsuremmen Village Council



## India nung taküm Asian Boxing Championship asayatsü

**New Delhi, Rongchii/April 13 (Agencies):** India nung taküm November-December nung tetsür aser tebur Asian Boxing Championships asayatsü, ta national federation-i Hombarnü metetdaksüba den iba mapang tashi nungbo COVID-19 tashidak ya azüokteter alitsü ta temulung lema bilemba lemsatepogo.

India nung tatemsa 1980 küm Mumbai nung tebur Asian meet ayongzuka asayaogo aser 2003 küm Hisar nung tetsür asayamung ayongzuka asayaogo. Iba asayamung ta taoba küm nungi tetsür aser tebur naprongla külemi asayar.

"Asian Boxing Confederation senden ka amenba sülen iba asayamung ayonga asayatsü asoshi onok nem February ita temelaba agütsü. Iba asayamung ya November-December nung asayatsü aser tensa tajungba akümba sülen asayamung ayongzuka asayatsü asoshi yimti shimtsü," ta Boxing Federation of India's (BFI) Executive Director R K Sacheti-i PTI

dang ashi.

"Tang tensa mejangjai aliba mapang ka lir saka June ita tashi nungbo iba ya azüoktsü onok ajaki imlaa atar. Iba sülen ita asem pezuka inyakyim süngjemshitsü asoshi mapang agütsü," ta pai ashi.

Iba asayamung ya küm ana nung khen asayaba asayamung ka lir saka taoba kümtem atonga asaya arudar.

"January ita bit benoktsü ayongzük. COVID-19 tensa tajungba akümba sülen Asian Boxing Confederation-i formal osang agütsü," ta Sacheti-i ashi.

"Asayamung asayatsü asoshi mapang ka atakzuka ayuba ajanga sentong yanglutsü atema onok nem mapang agütsü. International Olympic Committee (IOC)-i ashiba agi, Olympic qualification programme-a November-December nung tenzüktsü akok," ta paisa metetdaksü.

"Anungji asayamungtem tanga tesem nung asaya tenzükra onokia iba asayamung ayonga asayatetsü. Ibayongji onoki tang tashi yimti shima

mali. Iba dak sendakba nung sensak asemtsü asoshi linük mokdanga aliba agin atatsüla," ta pai shisem.

India mokdanga ayuba Mongolbarnü tembangtsü saka maneni atsulangshitsü asoshi renema lir, kechiyong state aika nung tashidak keta alir tali putetyonga aoer.

Iba wara ajanga linük nung saisapong calendar dak kanga mejungi kongshio go aser ano Olympics aser European football Championships-a 2021 nung asayatsü asoshi telemtetba agiogo.

Asayartem training nung tetsükdaksü adoker aser coach temi boxing dena online ajanga tutorials agütsü tenzükogo.

"Boxer tem onoki takok tashi anepaludar. Coach temi parnok training agiba kanga junga asadangdar.

"Tensa den kanga peta parnoki inyaksangshidar," ta Sacheti-i ashi.

Tang tashi nung India nung boxer tebur pongu aser tetsür pezü Tokyo Olympics atema qualify süogo.

## Sports Minister-i SAI Headquarters semdang



**New Delhi, Rongchii/April 13 (Agencies):** Sports Minister Kiren Rijiju-i Hombarnü Sports Authority of India's headquarter semdangogo, kong COVID-19 tashidak pokteter aliba ajanga hopta asemshi mapa junga minyakteti arur ketdangser tejentem aser tenungdakba staff tembo inyaksangshi tenzükogo.

Minister-i SAI headquarters semdangba mapang mask semer liasü aser headquarters telungi mai tsungda pa teka sanitise süa liasü.

"Ministry-i staff kar anir mapa inyak tenzükogo kechiyong mapabo maneni inyakyonga aotsüla. Onoki mask asema, temperature tendangba aser nisungtem tsungda tetsungda ita inyaksangshitsü asoshi tuyuba ajak shidak benoka inyakdaksüdar," ta Rijiju-i ashi.

Tashidak prokshia meyoktsü asoshi tekümdangshiba

inyakyim ka ama SAI office ya March 21 nü shibang.

Honibarnü ministers ajak dang Hombarnü nungi tenzuka joint secretary level officers aser tenungdakba staff tem densema inyaksangshi tenzüktsü asoshi tetuyuba agütsüogo.

"Divisional tekolaktem aser lower division staff shilem 30 dang melentepa inyaka atatsü. Linük ajunga mokdanga aliba ajunga magin tsungda maparentem tenzükshia atatsü asoshi Centre-i tuyuba dak ajemdaker iba jenjang agiogo," ta SAI ketdangser kati PTI dang ashi.

COVID-19 tashidak koba China nung poktet iba tashidak yagi India nung nisung 300 dak tema süogo.

Kasa mapang nung iba tashidak yagi alima ajunga nung nisung 100,000 dak tema süogo aser nisung 18,50,000 tema dak iba tashidak keta aliba tendangtetogo.

## Subhashish-i ayangertem nem chiyongtsü lemtsü



**Kolkata, Rongchii/April 13 (Agencies):** India nung football asayar Subhashish Bose-i South 24 parganas kübok Subhasgram jila nung ki makartem aser mapa malirtem nem chiyongtsü lemtsüdar.

Linük ajunga mokdang aliba mapang ka nung Subhasgram nung anepdangshia nisung aika tarensena nokdaker aliba angutsü. Panok rongnung local rickshaw anishirtem, aayangertem aser tilatiri shishilembartem densema lir, shirnok anogoshi ration abeni arur.

Bose shiba India team nungi asayar pa iba tesem nung nokdaker jangotsü, potatoe, onion aser tanga chiyongtsü pelashishia lemtsüba angutsü. Iba ya pa asoshi lokti nem meyipa agütsüba inyakyim ka lir.

"Rickshaw anishirtemi local asaya nung shilem agütsü asoshi aoba mapang ni angati agi anir senzüogo aser lenti nung shishilembartem aser dokan amenertemi ni junga asayaba sülen angati agi chiyongtsü

aiben agütsüogo.. Parnok nem meyipa agütsü nungdaker ta ni bilemer," ta India team left-back-i PTI dang ashi.

"Ni ainba tesem nung ngudanga alir aika nem chiyongtsü agütsütetba atema kanga temulungtsüogo," ta pai ashi.

Anepdang ka Swami Vivekananda indang o 'Arise, Awake, And Stop Not Till the Goal is Reached!' agi pa den jembiba Subhasgram-i lemsatop.

"Iba o agi kü den maneni jembiba. Ni iba ya odangbo metoktsütet aser ni ainba lokti nem meyipa agütsü asoshi maneni ajungmeso.

"Ajisüaka ni kanga mesüngjemteti aküm. Kidang lia kümzuka alitsüji kanga tongtibang ta angateter saka doctors, nurses, cleaners, police, journalists amala tasü iteremi pei taküm asoshi mebilemi timtem mapang nung pai linük tenzükdar. Yakbang nung inyakerteri dang masü saka nüburtemia pei shilem agütsüla," ta Bose-i ashi.

"Ajisüaka parnoki ajungtsü asü? asenok asen kidang ayong ayonga kazüa tangari asenok kümzuka toktsütsü asoshi inyakba maongka dang agia alitsü asü? volunteers timba nungdaker masü na? ta ni bilem aser nia apuso. Jangradem asoshi masü saka teyari agütsütsü asoshi ni apuso," ta pai ashi.

Paisa, pa Indian Super League aser Indian team nungi asayateta taküm anisungzuka alitsü asoshi maongka agütsüba atema Tsüngrem nem tenüngsang agütsü.

"Tsüngrem tajung lir aser ibayongji ni tanü parnok yaritetter. Kü nem tashi agütsüba atema Tsüngrem dang kanga pelar. Maparen ajak tetuyuba sülen anidaka inyakogo.

"Ni chiyongtsü agütsürtem ajaki kü den azütepner saka mazütepteter kechiyong inyaksangshi ajak tetsungda lia inyaksüla.

"Parnok karbo nüktzü tsünggranger liasü. Panok den azüteptsü atasaa litettsü kechiyong tensa tajungba küm daksütsü nungdaker. Iba mapang matong tashi kidang kazüang aser kümzuka liang," ta pai shisem.

Mumbai City FC defender ya Indian camp nung shilem agütsü yongyaa ataa liasü saka tashidak poktetba ajanga saisapong ajak anena lir.

"National team ka nung shilem agütsü yongyaa liasü. Ajisüaka tang tensa apir alima ajunga nung saisapong ajak thinenogo," ta pai ashi.

## Ni alo juli ka ama tamshi: Ivan Rakitic



**Barcelona, Rongchii/April 13 (Agencies):** Barcelona puri tawa pa amshiba yimya aser taoba küm pa kangshia yoktsü merangba atema Ivan Rakitic-i Barca aitsüogo.

Croatia nung asayar ya 2014 küm nungi Braca nung asayar saka Dutch midfielder Frenkie de Jong aruba sülen pa aibenbo asayatsü maongka mongui arudar. Iba season La Liga asaya 27 nung pa asaya 10 nung dang tetenzük nungi asayaa lir.

"Ni tensa angateter saka ni alo juli ka masü shiba dak nenoki kechi inyakerter inyaktetsüba masü," ta arishi küm 32 tain asayari ashi.

"Ni akhümtsübuba aser ni aginüba tesem ka nung asayaner. Idaki süra ni kanga pelatsü saka tangalen kar süra aji ni telemtetba agütsü aser shingai magitetsü," ta pai ashi.

Rakitic-isa, taoba küm Neymar tanaben meyipa anir arutsü asoshi Paris St Germain pur nem pa agütsüba pai magizük ta shiogo.

Paisa iba season team nung pa jenjang samaba atema tezü atangba lemsatepogo saka pai contract tembanga asayaner koba 2021 küm atemtsü aser iba tetezü Barca pur pa aoba ajanga kecha maazüktsü.

"Küm trok asayaba mapang taoba küm tajungba asaya liasü saka ni benshiba yimya agi ni kanga tezü atang. Ni kanga süngmang aser mangateti liasü. Result jungrarabo masü aser ni aibenbo masayatet aser ibayongji ni kanga yiruogo," ta pai ashi.

"Taoba küm tesadangka kanga balaka liasü aser ni süngmanga liasü, ajisüaka ni küm ka dang anunga lir asünung iba ya tembanga asayatsü imlar," ta paisa ashi.

### BILEM DANGANG

"Tia tensa ajak nung Tsngrembo memelenshir"